

«Far buna lavur en las incaricas actualas»

La Quotidiana ha dicurrì cun il nov parsura dal cussegl grond Duri Campell

DA MARTIN CABALZAR

■ Il presidi dal cussegl grond è in uffizi d'onur che vala sco renconuschientscha da la lavur prestada u sco segliera per ulteriuras scharschas politicas. Per Duri Campell (pbd Engiadin'Ota) che è vegnì tshernì ier cun in resultat onurific al timun dal parlament chantunal èsi probabel tuts dus. Sco descendant d'ina renumada famiglia da politichers ladins è la politica stada pli u main en il sang ed omnipreschenta a la maisa da famiglia. Tant pli ch'il bab da *Duri Campell*, il legendar Riet Campell, è stà in dals gronds politichers da ses temp en Engiadin'Ota. El è tranter auter stà 16 onns president communal da S-chanf ed ha appartegnì 20 onns al cussegl grond. Sco pur e manader da la scola da skis s'engascha il figl Duri Campell en sia giuventetgna cunzunt sin il sector da giuventetgna, dal turissem ed en il ravugl da las societads d'elevatur da muaglia e da las corporaziuns d'alp. Apparentamain èn ses convischins da S-chanf stads cuntents cun l'engaschament dal giuven pur da Cinuos-chel, uschia che quel entra 1997 – cun 34 onns – en la suprastanza communal da S-chanf. Trais onns pli tard vegn Duri Campell tshernì sco president communal, in'incarica ch'el exequescha anc oz – cun in'interrupziun da trais onns tranter 2007 e 2010. Sco capo communal fa Campell era part dal cussegl circital d'Engadin'Ota. Al cussegl grond appartegn ses nov parsura dapi 2006, suenter esser stà avant sis onns suppleant. En il cussegl grond ha Duri Campell fatg part da 2006 fin 2010 da la cumissiun per giustia e segirezza e da 2010 fin 2013 da la cumissiun da gestiun.

Il nov parsura dal cussegl grond Duri



Duri Campell, il nov parsura dal cussegl grond, ha dà pled e fatg a La Quotidiana.

FOTO Y. BÜRKL

Campell è dentant er in dals papabiles per il presidi da l'Uniun purila grischuna ed in dals candidats potenzials da la pbd sco successur da *Hansjörg Hassler* en il cussegl naziunal.

Betg tshertgà las incaricas

Quai che fa ussa forse la parita d'ina carriera politica planisada da fons ensi n'è per Duri Campell insumma betg il cass. Era sch'el saja adina s'interessà per ils fatgs publics haja el mai tshertgà da surpigliar in uffizi u l'auter. Quai saja simpelmain sa dà tut da sez. En ina cuminanza pitschna sa sentia il singul respunsabel per il bain funcziunar da la vischnanca e da la regiun. Sia tenuta saja d'ademplier «tenor meglier savair e pu-

dair» las incaricas surdadas, senza gia avair aspiraziuns per in proxim post, sincerescha Duri Campell en sia moda modesta e credibla. Uschia saja absolutamain ipotetic da discurren en il mument d'ulteriuras incaricas, saja quai dal presidi da l'Uniun purila grischuna u d'ina eventuala candidatura per il cussegl naziunal. Per il mument haja il presidi dal cussegl grond – che Campell considerescha sco gronda onur e sfida – assoluta prioritad. Tut l'auter saja anc scrit en las stailas.

Finamiras ed accents politics

Ils accents politics tshenta Duri Campell sin las suandantas tematicas: turissem, lavur voluntara, tgira d'attempads,

agricultura, chatscha e politica da famiglia. In accent politic durant ses presidi vegn la tractaziun dal rapport davart la promoziun economica ad esser. Temas centrals restan la realisaziun da la refurma dal territori e la nova gulivaziun da finanzas e la chatscha speziala. Era sche Duri Campell deriva d'ina vischnanca bainstanta d'Engiadin'Ota na fa el betg part dal comité da referendum e sustegn plainamain la decisiun dal cussegl grond. «Ina gulivaziun n'è betg pussaivla senza la solidaritad dals fermes cun ils flaivels», punctuescha Campell. Da quel princip profiteschia il chantun Grischun en la Svizra, il medem princip duai perquai era valair entaifer il chantun.

Dapi la separaziun tranter pps e pbd

fa Duri Campell part da la pbd. E quei cun persvasiun. E tuttina saja el tut auter ch'in schuldà da partida. Quai è tranter auter sa mussà a chaschun da la decisiun da tagl en connex cun la tematica da la taxaziun da la valita da l'atgna abitaziun. Qua ha Campell demussà ch'el e tut auter ch'in opportunist ed ha decidì cunter la maioritad da sia fracziun e da la regenza. S'entelli che quai n'haja betg plaschi a tuts. Per Campell èsi dentant impurtant che scadin possia s'exprimer e decider tenor atgna persvasiun e na stoppia betg sa suttametter ad in dictat da partida. Gist perquai ha el era preferì da politisar entaifer la Partida burgais-democratica e betg en il ravugl da la Partida populara che saja main toleranta e magari extrema. Persunalmain haja el tuttina bunas relaziuns cun divers exponentes da la Partida populara. «Per mai vai adina per la chausa e betg per la pussanza da partida u per politica da bloc», sincerescha Campell.

Ina buna rait famigliara

Duri Campell punctuescha dentant era che ses engaschament politic na fissia betg pussaivel senza ina buna rait famigliara. Quai èn sia dunna *Erna* e las duas figlias *Ladina* (25) e *Madlaina* (23).

En ina cuminaza da manaschi cun *Schimun Meng* cultivescha Campell a Cinuos-chel ina sufatscha da 63 hectaras cun radund 50 vatgadas. Dasperas maina Erna ina piazza da campadi. Ses frar *Riet Rudolf* e ses figl *Gudench* mainan l'ustaria ed il hotel Veduta a Cinuos-chel en terza generaziun.

Per sonda proxima è preparada ina gronda festa da retschivement per il nov parsura dal cussegl grond Duri Campell a S-chanf. Da quai sa legra il nov parsura, era sch'el n'enconuscha betg ils detagls da questa organisaziun che sajan per el uschia ina gronda surpraisa.